

hukum Islam.

Sekiranya tujuan ini dikehendaki jangan ada berlaku perkara-perkara sewenang-wenang terhadap wanita maka janganlah pula hendaknya hak suami itu diambil dan dirampas.

Dengan sebab itu adalah sangat molek kalau dapat dengan secara cepat kerajaan mengadakan pindaan dalam perkara yang tersebut.

Pindaan itu hendaklah diadakan dengan menyatakan bahawa sebarang perceraian yang telah berlaku hendaklah didaftarkan dan diberi surat pendaftarannya tetapi kadi, bagi pihak perempuan diberi hak menyaman suaminya dalam perkara-perkara yang mengenai belanja atau seumpamanya yang menjadi tuntutannya.

Maksudnya sebarang perceraian yang sudah dijatuhkan oleh seorang suami terhadap isterinya hendaklah didaftarkan dan jika ada sangkut pautnya hendaklah diberi hak baginya untuk menyaman atau menuntut suami menunaikannya mengikut undang-undang Islam. Tuntutan itu hendaklah dikuatkuasakan haknya dengan undang-undang negeri.

Sekiranya perceraian belum terjadi, maka kewajipan kadi atau pegawai-pegawai kadi mencari jalan supaya ada perdamaian di antara keduanya – ertiya badan penasihat di dalam perkara yang seperti ini, untuk mendamaikan, wajib berusaha supaya jangan terjadi atau berlaku perceraian itu. Dengan cara ini sahajalah kita rasa orang ramai tidak berpuas hati sebab hak-hak agamanya terkawal.

* * *

Umat Islam Singapura dan Piagam Wanita

Kerajaan Singapura telah mengeluarkan suatu isytihar pada 10 Oktober yang lalu menegaskan bahawa kerajaan

tidak mengganggu hal ehwal orang-orang Islam Singapura, dan kerajaan adalah sentiasa menghormati kepercayaan dan pegangan mereka terhadap agamanya. Kecuali atas perkara-perkara yang perlu diambil nasihat lebih dulu dari wakil-wakil orang Islam sendiri. (Kenyataan kerajaan yang tersiar itu ada disiarkan di dalam Qalam keluaran ini).

Kerajaan telah menyatakan bahawa kecaman dan tuduhan atas perjalanan pertadbiran Mahkamah Syariah sudah menyeleweng daripada asas agama yang sebenar itu adalah timbul dari salah faham orang ramai di dalam mengertikan pertadbiran undang-undang Islam Singapura.

Apa yang telah terjadi dan berlaku adalah terang dengan nyata bahawa orang-orang Islam Singapura, melihat daripada apa yang berlaku, berperasaan tidak senang di dalam perkara-perkara cerai (lihat rencana di atas) dan perkara kahwin lebih dari satu. Orang-orang Islam terasa bahawa tepat atau dengan tidak tepat bahawa orang-orang Islam Singapura adalah terlebih di dalam Piagam Wanita yang dikuatkuasakan pada tahun 1961 itu. Kerana itulah umat Islam Singapura menunjukkan rasa tidak puas hatinya terhadap kepada peraturan-peraturan yang dijalankan yang dipandang mereka sangat bertentangan dengan pengertian agama Islam yang dianut mereka.

Di dalam kenyataan kerajaan Singapura itu menyatakan bahawa tidak semuanya Piagam Wanita yang dikenakan kepada umat Islam padahal kalau tidak khilaf Menteri Kehakiman sendiri menyatakan dalam masa mengemukakan Rang Undang-undang ini, orang-orang Islam tidak akan dikenakan apa-apa di atasnya.

Tetapi kenyataan yang baharu ini menunjukkan bahawa orang-orang Islam adalah terlibat dalam ((Piagam Wanita)) di dalam perkara-perkara fasal (i), Fasal (7), (8) (10) dan (ii). Dengan ini orang tentu akan bertanya apakah ertiya

pengakuan kerajaan bahawa kerajaan tidak mengganggu hal ehwal umat Islam?

Sepanjang yang diketahui bahawa Rang Undang-undang Piagam Wanita yang dilibatkan orang-orang Islam di dalamnya, tidaklah dibahas atau diminta sedikit pun fikiran umat Islam, sekurang-kurangnya Lembaga Penasihat Islam Singapura.

Sebab itu orang-orang sekarang telah terfikir-fikir apakah ertinya yang demikian ini? Apakah yang dituju dengan maksud bawanya ((kerajaan tidak akan mengganggu agama mereka dan sentiasa akan menghormati kepercayaan dan pegangan)) mereka? Apakah dengan mengenakan sebahagian daripada Piagam Wanita kepada umat Islam tidak bererti bahawa kerajaan telah dan sudah mengganggu umat Islam?

Adalah menjadi seperkara yang tidak bijak sama ada dengan tepat atau tidak, membabit umat Islam ke dalam suatu perkara yang umat Islam sendiri tidak minta fikirannya terlebih dahulu. Kenyataan yang dibuat oleh kerajaan di dalam hal seperti ini dengan mengatakan tidak mengganggu hal ehwal umat Islam dan kemudian menyatakan sebahagian daripadanya ada dikenakan adalah umpama orang melepas batuk di tangga dengan cuba hendak menyelindungkan apa yang sebenarnya ada.

Tetapi walau bagaimana halnya pun langkah kerajaan berterus terang patut dipuji, terutamanya dalam menyedari bahawa umat Islam tidak puas hati atas perjalanan Mahkamah Syariah Singapura.

Majlis Penasihat Islam Dengan Umur Kahwin 16 tahun

Harus terbit daripada siaran kerajaan Singapura baharu-baharu ini yang menyatakan bahawa Majlis Penasihat Islam Singapura telah mengesyorkan perkahwinan bagi wanita

tidak kurang dari enam belas tahun dan bagi lelaki delapan belas tahun, telah mengeluarkan satu kenyataan yang disuarakan oleh pengurusnya, Dato' *al-Sayyid* Ibrahim bin Omar Alsagoff.

Kenyataan Pengerusi Lembaga Islam itu terlingkung di dalam perkara-perkara di bawah ini:

1. Seseorang gadis yang baharu baligh adalah dibenarkan dikahwini oleh Islam tetapi tidak pula digalakkan dan disuruh.
2. Peraturan boleh dibuat bagi perkara-perkara yang salah digunakan itu guna hanya mengelakkan hal itu dari disalahgunakan.
3. Jika sekiranya seorang bapa memaksa anak perempuannya kahwin pada masa muda maka ia melakukan sesuatu yang membahayakan masa depan anaknya, dan ini adalah menyalahgunakan apa yang dibenarkan itu.
4. Penentuan serendah-rendah umur bagi perkahwinan gadis di zaman dulu dan mengikut keadaan-keadaan tertentu sesuai dengan tujuan Islam.
5. Keputusan lembaga mengadakan umur 18 bagi lelaki dan 16 bagi perempuan tidak bermakna tidak membenarkan langsung perkahwinan antara umur menjelang baligh tetapi tidak mahu manusia menyalahgunakan apa yang telah dibenarkan itu.

Sekian khulasah kenyataan Pengerusi Lembaga Penasihat Islam Singapura kepada akhbar. Beliau juga ada menyatakan bahawa mana-mana perkahwinan yang kurang umurnya dari 16 tahun hanya boleh dikehwinan oleh *Chief Kadi* sahaja sekiranya ia berpuas hati.

Kita telah menulis dan membahas perkara ini dalam majalah ini dengan membentangkan bahawa jelas dan terang adalah